

# Fondo da sport e concept per promover il sport

La regenza respunda a duas dumondas persunalas dals deputads Remo Cavegn (pcd) e Livio Zanetti (pcd)

DA MARTIN CABALZAR

■ **L'emna proxima ha il cussegl grond tranter auter da s'occupar cun il fondo da sport e cun il concept per promover il sport. Instradà l'entira problematica han dus deputads da la pcd, Remo Cavegn (Panaduz) e Livio Zanetti (Landquart).** Già en la sessiun dal december 2010 aveva il cussegl grond gi acceptà l'incumbensa dal posteriu cusseglier guvernativ *Christian Rathgeb* concernent in concept chantunal da sport, incumbensond la regenza d'elaborar in concept chantunal per promover il sport.

Deputà *Livio Zanetti* ha vuli savair en tge stadi che las lavurs per promover il sport sajan e cura ch'ins possa quintar cun il relasch e cun la realisaziun dal concept.

## Differentas lavurs preliminaras

Sco quai che la regenza respunda figureschia l'elavuraziun d'in tal concept sco punct general en il program da la regenza 2013–2017. Uschia haja la cumissiun chantunala per promover il sport examinà – ensemen cun las instituziuns regiunalas da sport – pli exactamain ils instrumets per promover il sport sin tut ils stgalims. L'uffizi per la scola populara e sport che è la finala cumpetent en chausa haja plinavant defini ils champs d'acziun pussaivels ed analisà las disposiziuns legalas.

## Nova lescha è necessaria

En connex cun l'elavuraziun da questas basas per il concept chantunal per la promoziun dal sport saja sa mussà ch'il basegn da revisiun saja fitg grond, cunzunt tar las ordinaziuns existentas. Perquai è la regenza da l'opiniun ch'i stoppian l'emprim vegnir stgaffidas las cundiziuns generalas necessarias en ina lescha chantunala da sport. Il mument da far quai saja ideal tant pli che la confederaziun haja gist mess en vigur ina nova lescha federala davart la promoziun dal sport e da l'activad fisica. Ina nova lescha da sport grischuna possa pia vegnir coordinada en moda optimala ed actuala cun la legislaziun naziunala. En accordanza cun la nova lescha vegn alura elavurà in concept chantunal per promover il sport.

Ils emprims sbos per ina lescha grischuna da sport en avant maun. La regenza



La promoziun dal sport duai vegnir rinforzada en il Grischun cun ina nova lescha. MAD

za ha l'intenziun da dar als circuls interessads la pussaivladad da prender posiziun davart il sbos da la lescha en il decurs da l'onn 2013 e da suttametter la lescha al cussegl grond durant l'emprima mesadad da 2014.

## Fondo da sport

Sco quai che deputà *Remo Cavegn* (Panaduz) constatescha en sia dumonda parlamentara dispona scadin chantun d'in fondo da sport-toto/da sport. Ord quest fondo che vegn alimentà cun il gudogn net da Swisslos vegnan sustegnids projects che promovon il sport. Tenor l'ordinaziun davart quest fondo da sport è sia finamira quella da promover activitads da sport e da crear premissas favuravlas per activitads da sport che han in connex cun il chantun Grischun. In na dettia dentant nagin dretg expressiv da survegnir talas contribuziuns, di il giurist Cavegn. Dumondas per contribuziuns da passa 25 000 francs stettian en cumpetenza da la regenza.

Sco quai che Remo Cavegn ha pudì eruir cuntregneva il fondo da sport per ils 31 da december 2011 radund 8,883 milliuns. Da quels importia la summa avarta da garantias da contribuziuns a radund 3,355 milliuns, uschia che radund 5,527 milliuns sajan anc disponibles. Considerond il fatg che quai cor-

respundia a radund las quotas annualas da 2,880 milliuns vi dal gudogn net da Swisslos.

Remo Cavegn e consegnonts han vuli savair da la regenza co quest conto saja sa sviluppà ils ultims 10 onns e pertge che la promoziun da sport dal Grischun saja vegnida privada d'ina tala gronda summa da daners. Els vulan la finala era savair sche quels daners accumulads vegnian impudids il proxim temp per la promoziun dal sport.

## Vast sustegn per il sport en il Grischun

Sco la regenza respunda vegnan sustegnids cun questa finanziaziun speziala ils sequents 7 secturs da promoziun: stabiliments da sport ed edifizis da sport, materials ed urdains da sport, occurrenz da sport, promoziun da sportistas e sportists, delegaziuns ad occurrenz da sport da la Arge Alp, projects generalis per promover il sport e contribuziuns pauschalas annualas a las federaziuns per lavurs generalas da federaziun e d'uniun.

Per la lavur da federaziuns ed uniuns stat annualmain mintgamai radund in milliun francs a disposiziun. Passa 300 000 francs vegnan impudids per cumprar equipament, stangas da slalom etc. e cun 600 000 francs vegnan sustegnidas occurrenz da sport. Ensemen

cun ils pajaments per frequentar scolas da sport extrachantunales èn las expensas annualas fitg constantas e muntan annualmain a radund dus milliuns. Grondas differenzas dad onn tar onn datti dentant tar las contribuziuns a stabiliments da sport e per projects generalis, las quotas dals ultims onns han muntà da 300 000 francs fin a 2,65 milliuns. Per quest motiv è la regenza da l'avis ch'i dovria tschertas reservas per egalisar questa volatilitad annuala. Tenor l'ordinaziun da finanzas na dastga l'effectiv dal fondo betg crudar sut 2,27 milliuns. Questa directiva vegnia observada cun in effectiv avant maun da circa 8,88 milliuns..

## Mategnair la flexibilitad

La regenza è intenziunada da sustegnair las uniuns e federaziuns da sport dal Grischun er en l'avegnir cun imports sco fin qua. Perquai sajan dentant «ina planisaziun prospectiva ed ina deliberaziun economica» dal fondo da sport necessarias. Il medem mument vules ella però er esser financialmain flexibla avunda per laschar crescer chausas novas u cun sustegnair edifizis u projects pli gronds che servan a la promoziun dal sport pli pretensius. Sco quai che la regenza constatescha dentant vegnan las contribuziuns empermessas per 2012 probablmain a surpassar clermain la part dal gudogn.